

15.

Feldkirch, 1318, Dezember 20.

Heinrich, Ritter von Schellenberg verkauft an Rudolff, den alten Ammann zu Feldkirch um 40 Mark Silbers, Konstanzer Gewicht den Kirchensatz zu Muren und stellt als Gewähr den Ritter Ulrich von Sax.

Allen den die disen gegenwirtigen brief. ansehen. lesen. alder horent. lesen. Tÿn Ich her h a y n r i c h Ritter von Schel/lenberch.¹ kÿnt. vnd vergihe offenlich an diesem ^a briefe. das ich mit gütem rate. mit güter betrachtungen. vnd / mit verhengnüste aller miner erben den kirchsatz ze Muren der min was mit allen den nvtzen. vnd mit allen / den rehten. als ich. vnd min vatter den selben kirchensatz vnz her hant gehebt. han geben ze köfene rehte. vnd redelich. Rûdolf dem alten a m a n ² ze Veltkirch. vnd sinen erben vmb vierzich march silbers chostenzer geweges / des ich alles von im gewert bin. vnd das in minen nvtz komen ist. Ich und min erben sulen ouch des vor / genanden Rûdolds. vnd siner erben wer sin nach rehte. vnd vmb alle. vsrihtvnge. vmb den vorgehenden kirch / satz swa sie siner bedurfent an gaischellichem. vnd an weltlichem gerihte. vnd han im dar vmb gegeben hern V̇lrich Ritter / v(o)^hn S a x ze ainem troster vmb all (ver)rihtun(g)e des vorgeschriben kirchsatzes. vnd gebe dar vmb dem vorge / nanden Rûdolf. vnd sinen erben d(isen) brief besigelt mit minem Insigel. vnd mit hern V̇lrichs Insigel von s a x. / ze ainer of(fnen) warhait aller der vorgeschriben dinge. vnd gedinge. Ich her V̇lrich Ritter von S a x vergihe / ouch an disem briefe. das ich bin tröster des vorgehenden. Rûdolf des a m m a n n s vnd siner erben vmb alle vsrihtvnge. vmb den vorgeschriben kirchsatz. swa sie siner bedurfent an gaischellichem. vnd an weltlichem gerihte. / vnd han ouch disen brief besigelt mit minem Insigel. vnd han das getan durch des vorgehenden hern h a y n r i c h s / von s c h e l l e n b e r c h bete willen. — Ditz beschach ze Veltkirch in der stat. vnd wart dirre brief gegeben do / man zalte von Christes geburte drwzehenhundert jar dar. nach in dem ahzehendem jare an sant / Thomas abende ----